



KBC/Thuso

June/Lhadou 2021

KUM
57
Lhinna
So504

Regd.No.19134/88
<http://www.kbc.org.in> NAI/220/99
No-G-4/Regd.Magazine/
KBCThuso/MNP-81



PATE NIKHO

JULY EVENTS

Youth Employee Day - 11
Anthah Lop - 18

"Kapa theng eini pumkhat ihi bang a amaho jong pumkhat
ahitheina ding un, Nangman amahohi hong in"

John. 17:11



Gambih 11 Gambih Office sahna ding a thakonna



Gambih 20 Chate Camp



Twilelon Baptist Church (KBC Gambih 12)
NUTE NIKHO

CONTENTS

THUMAKAI HO

COVID-19 ANINA LE ATHUMNA/ <i>Editorial</i>	2
Pakai na-Pathen henga hung kile kittavoin.	4
HINKHOMSAH IN/ <i>Rev. Onkho Haokip</i>	7
Rev. Dr. Hawlngam Haokip/ <i>Bio- Data</i>	15
Gambih le Centre Church ho Diary	19
KUKI CHRISTIANTE LAH'A AMASAPENHO	24
TAHSA LEH LHAGAO PUIHINGTHEI THUGOLHO	25
Servanthood Quotes	26
LUNGHEM PI NA	27

EDITORIAL BOARD

<i>Chairman</i>	: Rev. Tonglet Haokip, President KBC
<i>Editor</i>	: Dr. M. Thongkhosei Haokip, General Secretary
<i>Joint Editor</i>	: Rev. Onkho Haokip
<i>Contributing Editors</i>	: 1. Rev. Thongkhohun Touthang 2. Rev. Lamkeng Lhouvum 3. Rev. Tongmang Haokip 4. Ms Tingneihing Kipgen 5. Rev. Lunkhosei Tuboi 6. Rev. T. Thangkhosei Haokip
<i>Design & Layout</i>	– Pu S. Lenboi Haokip
<i>Circular Manager</i>	– Pi Vahboi Baite
<i>Recorder</i>	– Ms. Nemhoichong Haokip

THUSO LAHMAN

Church/Organisation/ DepartmentRs. 300/-
Individual Rs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 70895979446 Contact thei.
Circulation to kisai lam Mobile No. 9862107393 bol ding.

Editorial...



"COVID-19 ANINA LE ATHUMNA"

(Gen.37:19)

Editorial

Amasatah in muntina um Kuki Christian chate jouse ahideh a KBC member ho jouse chung a i Pakaiyu Jesu Christa minin salaam kahinpe cheh uve. Ningkum March kichailam a pat Covid natna hisen vannoi muntin aholinga, mi tampin thina atoa, tamtah sotpi akijen nunga hung damdoh ahin, kumkichai lam chu apha tobangin ahung umin ahile kinep le kipana lentah ahung umdoh e. Chuti jeh chun eiho Indian PM Narendra Modi in World Economic Forum, Davos a nisim 25-29,2021 sunga chun India in Covid chung a agaljona kiletsah tah in ana phongdoh e.

Ahin, ningkum phat vel mama in Second wave ahung kisei kit tan, akhoh dan chu ningkuma sangin mi at-amthi jon ahi. Tuchung deh deh hi Christian houlha-cha natong India sungah 2000 vel athi e tin report akimun ahi. Chuleh eimi lah jong aha tohkhah lseh in ahi. Adeh in Dr. Nehginpao, Dr. Hawlngam, Dr. Kim chule adang tampi in lemna atoh un ahi. Akisei danhi ningkum (first wave) a chu aupa/ateh lam aboidehset in, tukum second wave a upa til ho le khangthahho chung a chule third wave hi chapang lampang chung a akhoh dehset in akiseiye. Hitia amun ho le kum target neidana aumhi koiham khat in control abol toh ahung kilou thimtai.

Covid natche thudol hi Bible ah amin mong in kipha hi jong le ninunung lama hitobang gal-le-tol, dammo-hise lan ding hi ana umin ahi (Luke 21:7ff). Ipi jeh a milungset them Pathen chun hitobang mihemte asang-aja a thina thei aphal ham ti jong dohthei hintin, hijong le Pathen in akiselguh (mystery) akoilah a

chu mihem chihnan amuphah jou lou ding chu ahi. Chu-leh, taona in hiche natchena asutang thei dem ti jong hi kimkhat in gelkhoh inte. Pathen chu amite taona asange ti Jesu'n eihil ui (Matt.7:7-11). Amavang Pathen ama phat le lungdeiya itaonao ahin san ding ahi. Hichea hi atahsan tampi kinepna ahitoh kilhonin lungmon na leh thahatna akimu uvin ahi.

Chukit leh, hiche damlouna a kona kivenna dinga Nah-tom (Mask) le Kikap (vaccination) ngai ham kiti jong mi tampi boina khat ahi. Nahtom hi Covid hung masang peh a nam kimkhat (Japan le adang dang) hon polam apot seh u le ana manchah jallun dammona ijat hamkhat le aui athang hoa konin ahoidoh un ahi. Hichehi covid kichatna seh hilouva eihon jong chon ngaina (culture) a neiyin apha. Kikap ding hi mi totchavai kimkhat in kichatna thei lim le ima abol jalun tampihi kikap ngamlouvin aumlo in aphamo leh e. Hichehi eima khut a kingam hijong le common sense Pathenin se-le-pha hetna ipeh manchah a government in apha hohi vel tampi munchoma kipatepsa ahitoh kilhonna mi million hijat lah a khat tou tou ipi ham khat jalla side effect neikha jong le kikap ding hi apha'n chule kikap tei angaiye. Kichihsah a eima le midang ikinaipihohitobang natna lampia umsa ding ahapoi.

Tulaiya lungmonna thei Bible chang phabep -

Pathen chu eiho dia kiselna le thahtna ahin, genthei hesoh pet tah a eipanpi ahi. Hijeh chun leiset pumpi kikhel hel ding hijong leh eiho ikichat louhel diu ahi. Ps.46:1,2.

Ajeh chu eiho tahsan vanga hinga ihuive, pola mutheiya hinga ihipouve. 2 Cor.5:7

Lungmon kadalhah peh nahuive, kalungmon kapeh nahuive, kapeh hi vannoi peh bang ahipoi, nalungu donsah hih un. Jn.14:2

Pakaiyin amite thahat pehen! Pakaiyin amite chamna pehen phatthei bohhen. Psalm 29:110.

Lungluttah a simho jouse chungah Pathen vangboh chang cheh tauhen.

2021 Pate nikho

“Pakai na-Pathen henga hung kile kittaovin.”

Joel 2:13 & 1 Chronicles 13:1-4.

ARTICLE

Joel themgao hi themgao neo (Minor prophet) somleni lah’a an-ichanNa ahi chule Pethu’el chapa ahi. Joel themgao lekhabu hi amatah in asut ahi. Joel themgao hin BC 835 –793 sungin Juda nam mite lah’a themgaovin anapangin ahi. Juda nam miten Pathen anasumil uva, Pathen phatthei boh achan nao sana dangka akon in jong semthu Pathen lim chom bongnou lim anahouphat uvin Pathen in amite a chonsetna kon’a akisih uva lung aheina dingun agamsung uva khaokhopite le ngetpite, khaosute, thinglung le khongbaite sepai hattah bangin gamsunga anasolin analansah’in loumajang jouse’a anche louhing gamga jouse ana nechai’un chule gamsunga tuinah jouse jong anakangsoh’in gamsung chu kel le chah genthei nale hahsat nan analodim tan ahi.

Pakaiyin aseijin, tuhijeng jon-gleh nalungthim pumpiu vin kahenga hung kile kit uvin lang, anngol toh thon kapuvin lang nalungthim u joh bot-eh uvin lang naponsil’u bot-eh hihuvn ati. “Pakai na- Patheng henga hung kile kittaovin ati”. Zion lhang’a a sumkon mutuvin lang anngol ding phonguvin, khompi pumpi kouvin lang upaho kou khom uvin lang Chapang neo nao noichep geijin koukhomuvn lang Houbung suthengun, pasal jinei thah bihbeh in jong ajitoh alupna dalhahen lang chule numei jineithah bih beh

in jong ajitoh agena dalha hen. Pathen in Joel themgao kam’a ahinsei kamiten achonset naova konna akisihuva alungu aheijuva ahile, keiman nahenguva kasol kasepaite, khaosut le khao khopite, khongbaite, thinglungte, nget pite, amahon anehchaisao kum chujat sunga mangthah saho chu kasemphat sohkei kit ding chutengleh Israel lailunga kaum jinghi nahet uva Pakai na-Pathen’u kei tailou adang aumpoi tia nahet diu ahiye. Hiche Bible changa konin Pate nikho Pathen thu anagelkhom dingin Pakai min in kahin temuve. Anojahin

achom lamtah in point nga (5) kahin tahlang in ahi.

(1) Mipa kitihi Pathen in thil jouse angahtup dingle aventup dinga ngase nale mopohna lentah eipeh u ahi, Genesis 2:15. Pathen in Adam mipa chu Eden hon'a thil jouse ngahtup dingle veng-tup dingin ana ngansen ahinla amatah jeng jong ana kiventup jou tapon chonsetnan anal-hatan ahi. Pateho tuni vannoi leiset pumpi'a Pate nikho ahitoh kilhon'a tahsan thei mipa le gin-chat thei mipa chule angha tup thei mipa Pathen in eingansena banga eima kiventup mipa chule insung eji-echa lhagao le tahsa lam'a vengtup cheh dingin ekitemuve.

Tulaijin mipa phabep in leiset nopsah nale duchatna lampia ama kituh tang joulou jeh'in lhagao lamvaija tampi aume hi-jehchun tunin ehinkho hi Pakaija pedoh'u hitin Pathen in eingan senao bangin suh linghoi hilouva pang dingin kahin tem uve. 4

(2) Isreal chaten a Pathen thingkong'u ana ngatup jouta pouvin Philistine miten ana lahpeh taove, 1 Samuel 4:2-22. Isrealte lah'a kon Pathen loupina anakitolmang tan ahi.

Insung mipaten Pathen thingk-hong chu enga tupjou u hinam? Insung'u, Houbung sung'u chule egamsung uva Pathen thingk-

hong hi elah uva umjing hinam? Pathen lhagao theng chenna thei dingin kisutheng jing'u hite ajehchu mitheng Paul in Corinth mite henga hung uvin Lhagaole tahsa kisuh bohna konin kisu thengu hite (1 Corinth 7:1) ajeh chu Pathen chu atheng ahi ati. Saul Lengpa jengin jong Pa-then asuhmil'a anunsun phatin Pathen lhagao thengin adalhan, genthei nale kanan amange. Mihem koi hijongle Pathen nung sun'a Pathen lungdei louva chonho chengse chu alhagao lungthim kapkap jenga tahsa jenga jong kipale lungmonna aneilou ding ahi. Pathen lhagao thengtoh chengkhom jing mite chu kipa nale chamna, lung-monna toh cheng khom jing ding'u ahi.

Pakaija sopi ngaitah teho tu ma-sanga Pathen lhagao theng'in nana dalhah sa ahikhah tah jongle hung kile kitin lang naji le nacha, nanu le napa chule Pakai toh lungmong'a cheng khom dingin kahin tem'e.

(3) Isreal te lah'a Pathen thingkong aumlou phat'in Leng David in i- Pathen thingkong'u chu eiho henga gapolut kit taote ajeh chu Saul nikho lai'a pat'a hiche Pa-then thingkong chu donlouv'a ei kikoipeh'u ahitai ati, 1 Chronicles 13:1-4. Pakaija sopi ngaitah teho Saul Lengpan Pathen thingkong akhohsah pon Leng David van-

gin Pathen thingkhong agelk-
hoh mama jenge.

Nangin eti nagelem? Leng higel
lhonna Saul Lengpan Pathen
thingkhong akhohsah lou, Leng
David in akhohsah chu egel
le mipa khatcheh kihicheh'a
mipa khat in Pathen thu gelk-
hoh mama jeng'a mipa khat in
Pathen hepha louhel'a aumhi a
insung a kipa na aneina dem? iti
nagel em?

tunin kigel phat ngai dingin
kahin tem'e. Nangin Pathen
nagel khole Pathen in nang
jong nageln khohding, nangin
Pathen nagelkhoh loule Pathen
injong na insung jong agelkhoh
louding ahi.

Vohsa kg 5 nachoh le atena song-
jong kg 5 ma gihding ahi. Mihem
in atu tu a atding ahi.

(4) Leng David Isreal te Lenga
ahung pan chun Pathen thing-
kong migam dang'a aum chu
ahinhol paijin David khopi'a
ahinpolut tai. Leng David in
Pathen thingkong akhohsah'a
migam'a konna Isreal gam'a
David khopia Pathen thingkong
ahin nung pohlut chun Pathen
in Leng David insung chu phat-
thei aboh'in, keima angunga
nangma insungle naleng gam hi
kiphutdet chehding, nalal touna
jonghi atonsot geija kitungdet
ding ahitai ati, 2 Samuel 7:1-16.
Leng David in Pathen thing-
kong Jerusalem'a anung pohlut

kit bangun eiho jong migam'a
kum ejat vaitham'a na lhagao
lengvai'a kapma lhagao genthei
nale lengvaina; juning saning,
leiset nopsahna jatchom chom
Satan thangkola kum ejat naum
hitam? hungun Pakai na-Pathen
henga kile kit taote chutile e-
insung'u pucca building sang'a
lhou jole det joding ahi. 5

(5) Leng David in Juda nam mite
lah'a Pathen thingkong amangsa
holdohna dinga alengloupi hina
jouse pum'a aboltheina sunle,
athahatna mangcha'a Pathen
thingkong amangsa aholdoh
banga, Pathen in nangle keijong
lhagao mang thaiho holdoh
dingle huhhingna hongunga
hinle puilut kit dingin Pakaijin
ei-mangcha nomuve. Leng David
bang'a nathepna naboltheina
chan'a pang dingin kahin tem'e.
Lhagao mangthai ho holdohna
ding'a nasum napai nanei na-
gou naphat mantamtah nap-
ehchu Pakai angung'a vangam
Bankaccount'a nakholkhom chu
nikhatle Pakai angunga kipa-
man lallukhuh nasan ding chu
aloupina lomlom'e. Houbungla
no.182 la sampan, khutgoh keo-
va kache dingham? lhagao khat-
beh huhhing louva atibang'a
Pakai lenggam'a anei agou atha
ajung tohjing mite chu Pathen
in adamlai sungin jong phatthei
boh jing taohen.

Kakipah'e. Pathen in athu phat-
thei eiboh peh taohen. Amen.



Genesis 6:19; Colossians 1:15 – 20

Rev. Onkho Haokip

Director,

Holistic Development Committee, KBC

ARTICLE

THILSEM JATKIM SEMPA PATHEN AHI

Bible dungjuiyin vannoi hi Pathen sem ahidan akicheh set jeng in (Genesis 1:1) chule Ama panna louva ima um theilou ahi (John 1:3). Pathen in vanthamjol hihen vannoi hileh thilsem jatkimho chu aven, pha asalheh jengin (Gen 1:31) angailutna sangpen jong achan in ahi (John 3:16). Hiche thilsem jatkimho hin akisemlona bang uvin kitahtah in ahing jing uvin chule na atong jing uvin ahi. Vetsahna in mihemte kimvel'a um thingphungkho hin mihemte ihmud lankah jeng injong hainahu asutheng jing uvin ahi. Mihem jaonaa leiset thilsem jouse hi kikhaoguijop cheh ahin khat beiya khat hing theilou ahi. Pathen in aphai atia athilsem jouse hi abidoi bang cheh uva

ahincheh uva achenkhom cheh uva khat le khat akikomto ding'u hi Pathen lunglam hiding ahi.

THILSEM JATKIM BIDOI NEI CHEH AHI

Thilsem jatkim hi Jesu Christa jal

leh Ama ding'a bidoi neiya kistem cheh ahin panna beiya kistem um lou, abonchaa atheng'a kistem ahi (Colossian 1:15-20; Acts 10:5). Leiset chung'a thil ahingthei jouse hi khat le khat longdel'a ahin khomthei diu leh

khat chung'a khat akingai ding hi Pathen deisah khat chu ahi, ije inem itileh Pathen thilsem jatkim hi khatcha ama cham'a hing-jou theiding aumpon ahi. Eiho mihemho jong ivel uva Pathen thilsemho jeh'a kihing jou ahibouve. Pathen in asuhthengsa thilsem mihem in athengpoi atina ding tha aneipon chule ajehbeiya amoh suhset diu jong Pakai kipana hideh lou ding ahi. Pathen thilsem jatkim hi apanna ding ihet uva mopohna neitah Christian hinkho mang pum'a ium uva, idei dei'u hijo louva ingaichat chathou bou iman chah diu joh ahi.

THILSEM JATKIM GIMGENTHEINA
Vannoi thilsem jatkim hin lampi ni in gimgenthei athoh uvin ahi. Akhatna achun, Adam chonset jeh'a sapset gentheina ahin, Anina achun, tukhang in vannoi mihemte thangthip le kiloset jeh in vannoi thilsemho in gimgentheina sangtah atoh jing uvin ahi. Thilsem jatkim in nitin le phat tin'a atohdiu dol akitoh jing ban jom'a mihemte akon gimgenthei tamtah athoh jing'u ahin kilhadoh nikho ngah jing'a um jing ahivu (Rom 8:21). Vannoi thilsemho akisuhgentheiya akisuhmang tengleh mihem mama kigenthei kit ji ahin, thilsem jatkim in mihemte ngaichat asuhbulhit jou lou tengleh mihemte amaho le amaho akihuhdoh jou deh pouvin ahi. Tekahna in mihemte in thing le song achintup

lou jeh uvin, khosat le khodap, twi hah le adang dangho atoh jing uvin ahi. Leisetna twisam put lou jeh le twi nah jouse akan jeh chule go aphatcha ajoh tah lou jeh'a vannoiya loulhou mi tamtah in thina ato jing ahitai.

THILSEM JATKIM CHUNG'A KITEPNA

Genesis bung 6 sung'a hin vannoi mite gitlouna thusim chule Pathen le Noah kikh'a mihem jaonaa leisetna thilsem jatkim hinkhom theina ding'a kitepna kitem thudol akimun ahi. Noah khanglaiya gitlouna thudol hi numei le pasal kikh'a chonset le lungthim'a chonset thudol akihaseiyn, hiche jong chu phatchom khat manchah ding haona le nopsahnaho kiseina jong ahi (Gen. 6:5). Noah chu chondih tah le amachang kitim them chule miphatah ahijeh jong hintin Pathen lungdei achang in, 'aphai'tia ana kou (Genesis 1:31) athilsem jatkim ganghingho le thilsemho chingstup ding in Pathen in Kitepna anasem tai (Gen. 6:18). Kitepna achun Pathen mopohna chu twisanglet akon Noah le insung mite avenbit ding chu ahin, Noah mopohna chu gamsaho le ganhing jatkimho kong sung'a ahoi lut ding ahi.

THILSEM JATKIM VESUI DING'A THUPEH

Gamsa le tahsaa ahingthei thilsem dangho amanthah louna ding uva 'abonchauvin nangma

toh hinkhomsah in, kiti Kitepna hi thil chintupna le vettupna ding'a kitepna ahi (Gen. 6:19,20). Pathen in athilsem jatkim alungsetna le aventupna tohgon aneiya abonchauva 'hinsah' ding kiti ahin Noah in thil ni anabol'in ahi: akhatna chu gamsa le ahingthei ganhingho chu akopkop'a kong sung'a puilut ding ahi Anina chu Noah in gamsa le ahingthei kongsung'a um jouse ding'a neh le chah nengjel'a akoikhol ding chu ahi. Hiche chun gamsa le ahingthei ganhing jouse in ipipi aneh uvem, ijat jat aneh uvem chule twisanglet kichai nigeiya anehkhop diu holdoh peh ngai ahi. An neh twidon aninglhin jengseh ahipon, sung le po akon ahinsusetheiho akon venbitna jong ngaicha ahi. Abonchauva ahinkhom theina ding uva tohgon tamtah lut ding, phatea vettup cheh ding, an neh twidon suhtup peh ding, lungneng tah'a vetkol ding, natoh lentah ahi.

LEISET MANTAMNA

Leiset hi Pathen sem ahin mihemte chenna ding le kihinsona ding chule Pathen loupiki phondohna ding'a asem ahi. Mihem le Gamleiset hin kikho-aguijopna hoitah anei ahi. Eima inmun cheh'a kon akipotdoh leh gamleiset chung akichon jin, gari jong gamleiset chung'a akilhaijin, lou mun jotna, kailhang le Office munho jotna jong leiset um jeh'a umthei ahi. Pathen hi vannoi lei-

set sempa jengseh ahipon aneipa jong ahi (Psalm 24:1). Gamtep gam chu Israelten alo jeng vang uvin aneipa Pathen in gam leiset johdoh ding in ana phal po'n ahi (Lev. 25:23). Gamleiset vettupna ding'a mopohna lentah hi Pathen lim le mel'a kisem mihemte kinganse ahi (Gen. 2:15). Thilsem jatkim lhachaa pang ding'u, thilsemho aventup diu, asemhoi diu le angailut jing diu tina ahi. Hiche mopohna chu Adam in apalkeh jeh in Eden hon akon akinodoh in gamleiset sapset ana chang tan, ulsa long pum in akinehhol tan ahi.

Gamleiset chung'a gunei lou-le-ai akikap jingleh natna hit sehseh hilouva gamleiset phatna ding'a um ganhing namkim jong abonchauva thitha ding ahitauvin, hichu vannoi thilsemho le mihemte ding'a damtheina hitalouva thina joh anahi jing ding ahitai. Tulaiyin mitamtah in Bible in usla long'a natoh ding thu asejeh in ulsa long pum in anop nop abol in hichu Bible toh akitoh'e tia sei jong akium in ahi. Ulsa lonna jouse chu chonphat ahipon, ulsa lonlouna jouse jong chonset ahidehpoi, anatoh chun apoh ding joh ahi. Gamleiset gentheina hi loulhou mite jengseh mitmo ahipon mihemte jouse lhahsam jeh ahi. Mihem in atutu aki aat ahibang in gamleiset iboldanhon hi eihon iki aat jing'u ahi. Neh le chah, don ding twi, sa le nga, thing le song,

huitheng le lhangtheng aum lou hi itohgau ikisannu ahitai.

HUI MANTAMNA

Hui theng kitihhi Pathen in mi-hemte hinna ding'a a-thilpeh (gift) mantam tah ahi (104:29-30; Ezekiel 37:5-6; Acts 17:24-25). Mihem in thilpeh akimu tengleh hoitah in akikisan in chule dingchang tah le homtho tah in akimang cha jin ahi. Pathen thilpeh Hui hi iti ikisan uva chule iti iman chah'u hitam tihi kidoh thei ahi. Mihem khat in nikho khat sung'a hin hui litre 2,000 tobang akihailut jouvin

namtui, car sung'a anamtui ding kikoio, Gari meikhu le thil dang dang tamtah akinahlut jin ahi. Khopi pam'a mivaichaho chenna nen kibohna le khopi sung'a in tamtah kisahna munho anamse, vut le meikhu umdohho jeh in mihem dammona tamtah apung jing in ahi. Vannoi mihem jouse in aneikhom asat-adap hihen hui le go hijongleh phatea venbit'a chule ngailut cheh ding hi heng le kom ingailutnau lampi hoitah khat ahi. Hui suhtheng ahitheina ding'a hui suboh theiho suhlhom angaiyin ahi, hiche chu mi khat le gamkhat ding'a phachom hil-



ahi. Hui hi akimuthei lou jeh leh manbeiya kihailut jing ahijeh in phat tamjon amantam dan le ak-hohdan akihe doh ji poi. Ahinlah hui mantam dan hi dammona jalkhun'a uma haikhop louna nei chule Oxygen kibupehho le insung mite in amantam ahahet dehseh diuvn aum in ahi.

Hui ihailutnauva hin hui then-glou, mihem kihoisahnaa kisem

ouvin mi jouse ding'a phachom ahi. Tukhang mite in khang kit ding'a itobang hui adalhah peh ding'u ham tihi kidoh ding khat ahi. Tutua mihemte in hui asuh-boh dan'u hi khonung'a dammo veisetna ding jeng ahidoh tan thil phamo tah ahijing in ahi. Thilsem jatkim hi inu le ipa in eipeh'u ahipon, ichateuvin eiho akan akilahson ding uva Pathen in eichinsah'u ahi.

GAMMANG SUNG'A THINGPHUNG

Bible hi thingphung kiminhphah-na dimset lekhabu ahi. Bible lekhabu masapen, Semtilbu bung khat akon in lekhabu nunungpen Thuphon bung nunungpen geiyin thingphung chule gam le go akiminhphah jingin ahi (Gen.1:11-12; Rev. 22:2). Jesu Christa hinkho jong apen apat athichangeiya thing toh akisamkaina dimset ahi. Gammang le pahcha lei vil'a cheho in heicha chempong ahem ahemlou vetna le khut thah lhao-naa thingphung le pahchaho sat lhah le suhset hilouva lim kilahpi le agam dinmun kipapi jeng ding hi Bible thuhil toh kitoh ahi (Deu. 20:19-20). Gammang ineihou hi mantamtah ahijeh in gamsung'a chengho aman dan thep cheh ngaicha mama ahi. Sumkoloveina le thil chom chom jeh'a gammang umho suhbeina le lahman-gna neiho chule sa le nga umho mohsuhbeihou phatea hilthem ding hi Christiante mopohna himo louhel ahi. Thingphung khat chu phatah'a ahung pilhin leh hiche achun jucha vacha in kihinsona anei thei uvin, leiset atuhchah in, mitemte ding in hui asutheng in, aga akon in neh le chah apengdoh in, go le dai asemboh in, lei thao asemboh in, chule lou le ai asemboh in ahi. Thingphung khat sehseh in mihem tamtah le ganhing tamtah hinkho asemboh jou ahi.

Vannoi pumpi ding'a gammang umho hi gamsaho le lou le ai kimuna munpi ahin, eihon hiche gammangho isuhset uva isuh-mang jinglai chan uva mihem hinkhoa angaichaho isuhset uva chule Pathen thilsem isuhset-nauva hung pang ahi. Gamsung'a um Ju le Va, Sa le Nga umho hi mihemte in nehmona imacha aumpoi, ahinlah suhgamelna thei lampiho akon kikangse vang thilpha hiding ahi. Tekahna in Gamlen jong hi gamsaho akimat phat'u chule anaovop lai tah uleh bolda thei ahi. Ajeh chu hiche pet chu akitha leh khat seh hilouva anoupeng ding tamtah pum'a thitha ding gamsa chu kum phabep jouleh kam doh ding ahitai. Hiche bang'a chu vadung le vacha'a nga mat jong hi gu jatchom chom le Battery jatchom chom mangcha hilouva bom do, lense, lenthang kam chule lhalka lhei kitihoa mat ding ahoijon ahi. Chuti chu ahilouleh vadung'a um ganhing le nga um jouse asi asenna kithat jing ahin hiche vadung'a chu avel'a twi ganghing kimoh sepdoh kit jilou ahitai.

ANNEH TWIDON MANTAMNA

"Mi vaichaho in an ngol louna ding in na hatoh in atong jing uvin mihousaho in an aneh'u asung uva amin theina ding in ulsa lonna ding in hatah in apang jing uvin ahi," akiti'n ahi.

Vannoiya mihousa tamtah in anneh twidon tamtah akichoh uvin chule tamtah jong asuthang jiuve akiti. Delhi khopia Five Star Hotel 35 umho chun nitin in twi 15 million litres amang doh jou uve akiti'n ahi. Hiche twi hi inbul 36,000 kimanchahna ding'a lhingset ahin. Hiche Hotel-ho in nikhat'a twinen 10 million litres asemдох jiuvin ahi, hiche twinen asemдохhou hi mihem 4,50,000 in nikhat'a asemдох jat toh kibang ahi akiti. Hiche twi nen kalval in hiche Hotel-ho hin thilnen tone 4/5 (Kg 400/5000) asemдох jou'in ahi. Hiche chung chon in Tha (Energy) asuhmang uhi insung 30,000 suhmang jat toh akibang in ahi, akiti.

Abangkom leh lhagao an hatah'a akikhoah val jeh in tahsa an hi akigekkhoh jou jipon ahi. Mihemte neh le chah ding'a kitem thilsemho hi kikhong deldel le angaichaho kipehto deldel ding dol ahi. Mihem hi aduchatho in atuhchah sang'a aduchatna atuhchah ding hi dihjo ding ahi (Proverbs 23: 2, 20, 21; 28:7). Mihemte in mi vaichaho don louva an ahaneh behseh'u (anehval jeh) uva Pathen lunghan achung uva thei ahi (Ez. 16: 49). Jesu in mi 5,000 val avahva chun anehmo chengseu chu phatechaa lohtup ding in seijuiho thu apen ahi. Insung'a kimangsa twi nenho hi hon'a muchi chivoho ding'a manchah pha iso theiyu ahin chule thilse phabep jong hi thah-

sem thei ahi. Israelte in chang a-aat teng uleh meithai chagaho le mivaichaho neh ding'a themkhat khat adalhah'u ahi (Lev. 23:22; Deu. 24:19). Ineijou jeh'a ineh ding kalval'a kicho, manchah lou ding thil kichoh'a, inei ding kalval'a kinei'a, genthei hahsa vaichaho lhasam'a aum ding dihlou ahi. Neh le chah nengjeng jung'a bolho sang'a ahiding khambep'a kimangchaho pachatna peh joh'a; thil suse jingho sang'a thil semphaho pachat joh ding; gamleiset subohho sang'a asuthengho pachat joh ding ahi.

MUNTHENG MANTAMNA

Thil neh mang lhom ding le suhmang lhom ding jengseh hilouvin thil suhthang lhomna ding'a panlah ding jong loupi tah ahi. Pathen chun Isrealte chu thilnen/jun le eh phatea paidoh ding dan jong ahil in ahi (Deu. 23: 11 – 13). Gamsung'a kho le veng athen louleh natna hit tamtah ahung kondoh jing theiyin ahi. Thilsem subohho le suhthangho chung'a Pathen in thu atan jing ahi (Ez. 34: 17 – 24). Pathen thilsem, ahideh'a neh le don le thildang dangho ajehbeiya isuhnen dan'u, isuhboh dan'u le isuhthang dan'u hi ichung uva Pathen thutanna um thei ahi. Numbers 35:33-34 achun, "Hitobang'a hi nanghon na chennau gam na suhboh thei lou ding'u ahi; ...Hijeh achu nanghon asung'a na chennau gam hi na suhboh louhel diu

ahi, agam lailung tah'a hi keima cheng ka hi; ijeh inem itileh Pakai kitipa keima hi Israel chate ja lah tah'a cheng jing jeng ka hije," akiti'n ahi.

Hiche thudol hi tukhang jeng injong adih jing thei nalaiye – mihem kingolbolna, tol kithana le thudihlou'a hin gamleiset asuhboh ji ahi. Khopi sung hihen lampi pam lah hileh thilboh lhemlung bang'a akisetvum jeng hi ama nen kisuhtup lou atam jeh ahi. India sung'a thilboh lohtup le paimang mihem 15,00,000 apat 40,00,000 vel mi aum in amaho hin kum seh leh nen 62 million tonnes abodoh jou uvin ahi. Amaho hi nennah, anamse lah, kisuhkhahna thei tamtah lah, natna tamtah kilahsonna thei mun'a chatloh ahiuvin ahi. Eihon phat tamjoa in lhagao thudol'a thenna thu isei jing uvin ahi, hichea kichai louva tahsa hindan khochen dan le inchen khosahdan athen ding jong hi lhagao thu toh kidou jong ahidehpon mihemte damtheina le khantouna ding joh ahi. Kim khat chu mipi kikhopna muna thengsetna hung kicon, ahia akhosung le a-inkimvel le insung nendeh jeng jong akiumda pon ahi. Pathen hi thengtah ahin amite thengtah ahiding adei jing chu ahi.

THILSEM JATKIM CHUNG'A NEICHIN

Pathen in mihem ahou avaicha abonchauva athilsem jatkimho chingtup le vetup ding'a neiching pha ahicheh ding'u adei ahi. Hiche thudol'a neocha hijongleh hetthemna neiya mihem in ama hitheina kham kham'a mopohna alah tengleh vannoiya kikhelna hunglung ding ahi. Nehemiah 2:18 a kisei bang'a kithah pat phat ahitai. Pathen in athilsemho angailut ahitoh lhon'a eihon Pathen ingailut nau hi athilsemho chung'a itahlang diu hi thilpha ahi. John 3:16 khun, "Pathen in hibang'a hi Christiante angailut ahin," akitipon amavang, "Pathen in hibang'a hi vanoi angailut ahin," kiti ahi akitin ahi. Hiche vannoi gamleiset le thilsemho jouse jong hi jaotah ahidan ana kihe-doh jipon ahi. Pathen ingailut nau hi muthei tah'a thilsemho toh ikikhoaguijopnauva kon kilang jing ding ahi. Pathen ngailut ding thu ilhangsap chan uva Pathen in angailut thilsemho ingailutna thei ding uva lhangsap tha ding dol ahin, hiche angailut chu vannoi mihemte le vannoi thilsemho hi ahiuvin ahi.

"Leiset chung'a hi nangho phabep beh hinso teina ding le akihinso chengse chu hing jing'a aum theina dinguva Pathenin nangho masang'a einasol masah ahibouve," tin Joseph in anaseiyin ahi (Gen. 45:7). Ama chun apanmun chu ama chihna le thepna chule boltheina vang hilouva Pa-

then tohgon lolhin theina ding'a midangte kihinsona ding'a phatthei konna lampi khat ahidan akiketdoh jouvin ahi. Phattheina imuhouhi eiho jong midang ding'a phattheina lampia ipan theina ding'u ahibouve. Hiche hi mi tamtah lunggel dan toh kitohlou chu ahinai. Mi tamtah akonin, "Keima kitahtah in ka pang jing in Pathen in phatthei eiboh jing'e," ti thugol hi ijah jing'u khat ahi. Hiche hi adihmo poi, ahinlah hichea kichai jeng louva Pakai neiching ihu toh lhonna phatthei ichanhou hi angaicha dangho jong ihop ding dol'u ahi.

MIHEMTE PANLAHNA DING

1. Insung taokhomna le houbung/houin sung thumunhoa Pathen thilsem mantam thudol seiphong pan thei ahitai, hichu chonset ahipon chonphat joh ahi.

2. Khopi sung'a cheng hon eima chenna insung, inpam dung'a pahcha, thingphung neo le ganhing vahtheiho vah in apha. Hichu Pathen thilsemho pachatna le hinkhom nomna lungput ahi.

3. An neh twidon hihen thildang dang hijongleh kimanchahnaho suhlhom tei apha, eima in ahiding khambep iman chah tengleh thil kisemna thil tamtah tah kisuseho chu hung lhom suh ding ahitai. Hichu thilsemho

huhdohna lampi ibolthei khat ahi.

4. Thilnen ineihou ahithei chan'a leithao ahung kisodoh kit theina ding'a koitup ding apha, ijemtia leithaova kisemtheilou thil aumleh thilthah khat kisem kitna (recycle) thei ding'a koi khol ding apha. Hichu eihon leithao um kit theina ding'a pan ilahnau ahi.

5. Eiman inei jou man'a leinai le leiset chung'a thao umho jouse moh suhmang ding jeng gel lou apah, hicheho akiha suhmang channa gam leiset hin asetna lam amano jing ahi.

6. Leiset chung'a thilsem jatkim hinkhom theina hi angaikhoh pen khat ahidan eima jong kitilkhoh jing angaiyin ahi. Chapanghon jong "social media" avet teng uleh thildang sang'a hiche lampang ha vetsah in apha.

7. Pen nikho, kichen nikho, thina nikho, twilut nikho, kipa nikho le hetthei tah nikhoho iman tengleh anikho khoa kichai jeng ding'a thil tamtah akibol chungchon'a inmun, lou mun le gambah khat'a thingphung/pahcha khat khat beh phu in ahoiyin ahi, hichu tu le khonung changeiya thilsem jatkim damtheina ding ahi.

8. Gamsung le chenna jol sung'a ganhing umho hinghoi cheh'a lungmong'a chensah hi thilsem jatkim hikhom theina ding'a

panlahna lentah khat ahi. Ak-hoh dungjuiya sa le nga mat ding neihon jong akitimatpet ule anaovop pet uva man louva chule vadung'a gu jatchom chom manchah louvin aphaï, hichun sa le nga amanthahsah lou ding ahi.

9. Loulhou mite in loumun'a muchi jatchomchom atuna di-uva kitilkhovun aphaï, hiche hin gamsung'a thilsem jatkim hinkhom theina ding lampi ahin lhut ding ahin gam leiset ding'a leithao kipehbehna jong hiding ahi.

10. Chapangho le khangth-ahte hi lhakhat sung'a 'Sunday School class' khat beh'a hovin vel suhthengsah'a ganghing umho le thingna louna umho jong hetthemsah in aphaï. Mundang'a azil'u khu Pathen thu toh azilkhom louu ahi, Sunday School'a akihil leh Pathen loupina amudoh thei ding'u ahi.

11. Gamsung'a thingna louna kisat lhuh jingna, gamsung hallhahna, leiset le ganhing thina thei lou le ai kimangho aum kit louna ding'a mipi in pan lahkhom'a dinkhom ding in aphaï. Gamsung huhtupna ding'a mipi dinkhom ngaicha jing ahi.

12. Houbung injong Pathen

thilsem jatkim hinkhom theina ding'a panlah ding dan seikhomnaho pat in aphaï. Pathen thilsemho semhoina ding le venbitna ding'a Christiante in pan alah ding'u hi vannoi vah ahinau khat hithei ahi.


13. Psalms 104 sim'a Pathen thu dungjuiya thilsem jatkim hinkhom theina thudol hetthem ding ngaito in aphaï. Bible a phatah'a kisunlut ahin eihon isimdoh uva ihetdoh uva imanchah diu kivat ahi.

14. Lekha peh le thingphung huhdohna ding'a Office mun'a lekha kitatho moh tata louva aki tadoh (print) masang'a phatah simtoh le semtoh masat ding aphaï, ijemtia vetlhah ding'a kitatdoh ahijongleh lekha aluisa akilelang akijihpolsaho manchah in aphaï.

15. Pathen thilsem jouse le gam leiset hi koimacha tum'a ahipon vannoi mite le asung cheng jouse kikkhong ahin, hinkhom cheh theina ding le gamsung adamtheina ding'a Bible in mi-hemte panlah ding adeisahna ban'a kineosah pum'a aheng'a atao diu adeisah ahibang'a taona pum'a dinkhom ding aphaï. Hichu Pathen thu initnau le igam'u kisemthahna lampi ahi.

REV. DR. HAWLINGAM HAOKIP

1938 (May) - 2021(05th May)



Rev. Dr. Hawlingam Haokip hi 1938 May Ihan Khangbarol khoa cheng (L) Pu Jamkhotang Haokip le (L) Pi Neilam Haokip chapa in ana peng e. Amaho insung hi Pathen houlou mivaicha insung khat ahiuve. 1953 August Ihan Evangelist Bakh Singh lekha sut "UNSPEAKABLE JOY" ana sim na a konin Pakai Jesu ahuhhingpu le alengpan ana kisan in, January 11, 1957 kumin Rev. Seikholet Singson khut a baptized ana chang in ahi, Amahi KBC Centre Church New Lambulane member Ihingset khat ahi. 1969 October 16 nin MBC Centre Church ah Rev. T. Lunkim in Miss Thongkholhing Haokip toh anagomin ahi. 18th March, 1975 kumin Pakai Lhacha hina (Ordained Minister) chu Rev. Seikholet in Pa Pathen, Chapa Pathen le Lhagao Theng Pathen min a achung a khut ngapna

aneijin ahi. Amahi KBC kivaipohna sunga General Secretary posotpen ahina bana Doctor of Ministry masapen jong ahi. KBC in jong “Emeritus General Secretary” kiti title ana pe’n ahi.

THEMJILNA LAM:

Insung genthei tah a kon hijeng jong le themjilna lam hi ana ngaisang in, 1961 kumin Guwahati University ah Matric ana chai jin, B.A. hi 1978 kum in Guwahati University mama in ana chai in ahi.

Rev. Dr. Hawlngam Haokip hin 1962 June lha a pentahna ana nei nia kipat a chu ahinkho hi Pathen natohna dinga ana pehdoh a ataona a chu, “Pakai keihi tunia pat a keiya kahi tapoi, nangma a kahi tai. Theology simna ding nangma deina mun mun a nei sollin lang, na kahin toh teng jong le kol lah hihen phaicham hijong le nangma deina mun mun a nei sol tan” tia kipedohna ana nei ahi. Kipehdohna anei toh kilhonin Pathen thu jilding in 1967 kumin Jorhat ana jonin, Eastern Theological College mun ah B.Th. ana sim in, chu jouvin B.D. Serampore College ah 1977 kumin ana chajin ahi. Pathen phattheibohna ana chang in 1981 kum chun D.Min. sim dingin USA ana jonin, lolhing tah in D.Min. Southern Baptist Seminary ah ahin chajin, Rev. Dr. Hawlngam Haokip hina title chu ana chang tan ahi.

PATHEN NATOH:

Pathen natong dinga ahung kipehdoh jouvin, 1967 kum chun Ngulhao Memorial Bible School, Motbung ah Headmaster in ana pangin, Rs.195/- ana sangin ahi. Hinlah vangset umtah in 1967 September chun KBA lamkai hon ahin nodoh tauvin, Imphal a ahung kichonlha in ahi. 1968 chun amasapen a dingin Kuki Baptist Convention in General Secretary hina tohmun ana la pan in ahi. Hichun, KBC Office jong mun kichehtah ana um lou lai ahi, KCC room neokhat chu office a ana man u ahi. 1970 – 1977 sung chun office kicheh ana umlou jeh in mun chom chom in ana kichon un ahi.

Ama panhat na jal a tu le tua KBC Office hi Pakai kum 1978 July chun semi pucca inn khat ana kisa a office kichehtah umpan ahi. General Secretary ahina banin 1974 kum in KBC Imphal Gambih jong Gambih Pastor hina in ana potha in ahi. General Secretary toh Men Society Secretary mopohna 1987 chun ana kop in ahi. Chuleh 1989-94 sungin Development

Secretary mopohna jong anakop in ahi. 1999-2001 sungin Missionary At Large in ana pangin ahi. KBC sungin tuni changei hin Committee le Board chom chom in Chairman hina leh member in pan ala jing in ahi.

KBC PAMMA ATOHNA HO:

Pathen phattheibohna ana changing KBC sung bou hilouvin kiloikhomna chom chom in jong pan nasatah in ala in ahi. 1969-94 sung in Bible Translation Committee member (KCC) in ana pangin ahi. Imphal City Penetration Plan Committee in jong Pakai kum 1975 chun Chairman in ana pang e. 1978-79 sung in Council of Baptist Churches in North East India (CBCNEI) in Executive member chule CBCNEI Medical Committee member khat in pan ana la e.

Manipur Baptist Convention (MBC) in inei sun u Manipur Theological College in 1983-91 sung in College Board of Governor Chairman in ana pang in ahi. Pathen thu hetna lam a sangtah nei ahi jeh chu 1985-91 sungin Eastern Theological College Board of Governor Executive Committee member khat in ana pang in ahi. Kipumkhat ding deisahna jal in Kuki Chin Baptist Union tua Council of Evangelical Churches kiti hi ana phutdoh un, hiche kiloikhomna a chun 1981-99 sungin ama President in ana pang in ahi. 1983-99 sung in Kuki Evangelical Churches Union President in ana pang e. Hiche kiloikhomna a hin ama jong aphutdoh loi (founding member) ana hi e. Pakai kum 1985 chu ikailhah nau Manipur Baptist Convention (MBC) ah President in ana pang in ahi. 1988-92 sung in Haggai Alumini Association, Manipur kiti kiloikhomna in President hina dinmun in ana pang e. North East India, Informal Regional Consultative Committee member in 1989-94 sung in pan ana la e. CBCNEI kiloikhomna in 1990 chun President ana hi in, 1989 chun Vice-President in ana pang in, 1990-92 sung in CBCNEI, Executive Committee member khat in pan ana la e. 1991-96 sung in Church's Auxiliary for Social Action (CASA) NEI Sub-Committee member khat in ana pang e. EFI kiti kiloikhomna in 1991-96 sung in Executive Committee member in ana pang in ahi.

1993 chun Kuki-Naga boina sulhap ahitheina dingin Committee on Restoration of Normalcy Committee member in pan nasatah in ana la in ahi. Kuki Christian Leaders Fellowship (KCLF) kiloikhomna in 1993-99 sung in President ahi

in, 2002-05 sung in Executive Director in ana pang in ahi.

GAMDANG/GAMPAM A KBC THALHENG A AKALSONNA HO:

Pathen lungset jal in gam dang (foreign) mun chom chom in KBC thalheng in ana kalsong jing in, KBC achoisang in ahi. Forth Asian Baptist Youth Fellowship, Thailand mun Chonburi Beach in 1970 chun KBC thalheng in ana kalsong in ahi. Amsterdam, Holland International Itinerant Evangelist Conference 1986 a ana um chun anakalsong in ahi. 1987 in Haggai Institute Advance Leadership Training, Singapore mun a ana pang in ahi. 1991 in Baptist World Alliance General Council meeting, Canada in agapang in ahi.

SALT Training kiti training 1992 chun Baptist Rural Life Centre, Phillipines ah aga pang in ahi. Baptist World Alliance, general Council meeting in 1994 chun Sweden ah KBC thalheng in pan anala e. September 24-27, 1994 sungin Baptist World Alliance thalheng ho toh, Nepal in Kuki Naga thua kihouna in apang in, NBCC Office thensona in jong ana jaove.

Chuleh 1999 chun Development khohsahna jal in Bangladesh mun a Development Tour in ana kalsong e. 1978 in Maxico Metamoros le Ranosa ana che in, 1983 in Isreal Biblical Roots Study (Bible kisutna mun ho) study aga bol in, 1994 in England ah gamve in an ache e.

AHINKHO ACHAINA LAM:

Chutobanga damthei tah a hinkho aman jing laiyn achesa nisim 3 May vella pat a tahsa nopmona le hai lampanga ahasatna jep themkhat khat ahintoa, amavang midang ho toh jong noma ainmuna kona phone a hijong le kihou thein alai ahin, hijong le 4th May nilhah a aboi jep phat a JNIMS Hospital analhut u ahin, lupna touna ana changjou pon, hijong le asunga natong kihetpi ho jallin room ahung changin, ahin ageilam ana hitan, Doctor hon tulainatna alu/alhoh a Lutman tadanin aseiyun, hijeh chun nisim 5th May 2021 nilhangkai nidan 5:00 PM vel chun loupi na gama dingin angailut aji, acha, ahoubung chule agol apaiho dalhan Pa koma choldo dingin ana masatai

CENTRE CHURCH LE GAMBIH-HO

GAMBIH NO. 1

LANGOL C/C: KBC Centre Church, Langol Plot extension, kum 2018 a ana kibol, thu le la kichehlou jeh a paissa peh bangkhai ana um Dangka Lac 2 chu Lhatun nisim 29, 2021 jingkah in Rev. Tonglet Haokip, President & Chairman, KBC le Finance & Property Committee makaina noiyah Rev. Thongkholun Touthang, Secy. Fin & Property Committee, Church Pastor chuleh Board of Deacons KBC C/C Langol chengin gam man suhthengna anei tauvin ahi. KBC a dinga hitobang tohgon lentah tongdoh theiya eikoivu Pa-Pathen loupina chang hen. Church Plot kehletna dinga pan lentah la lamkai jouse chungah Pu T. Paominlen Haokip, Hb. Secretary, Langol C/C in houbung mipite thakhel in kipathu ahinsei jin ahi.

GAMBIH NO.4

KICHENNA KINTHENG: Lhatun nisim 30, 2021 in KBC Gambih No.4



hopsunga um Centre Church S. Salem Saikul ah Gl. Thangboilal Kipgen le Ng. Kimneo Haokip in Rev. Seiminlen Haokip, Church Pastor thempu hinan Pathen minin kikhutsuina anei Ihon tai.

GAMBIH NO. 7

(i) KIPANA MAICHAM: KBC Gambih No. 7 sunga um Sajal (Loibol Khonou) akon Gl. Nehkholun Haokip in Caleb Institute, New Delhi, a M.Div. lolhing tahin ahinchai tan ahi. Hitoh kilhon in nisim 29th April 2021 (Thursday) nikho'n Kipana Maicham sempehna kin akimang in ahi. Hahsatna tampi thoh galkaiya lolhinna hin nei Gl. Nehkholun Haokip kipapina sangtah akinei toh Ihonnin maban in jong Pakai lhacha lolhingtah ahung hiding jong igaldot uve. Hatchungnung Pathenin mapui jing taken!



(ii) HOU DANTHENG A KIENGNEI DINGA LHAHDOHNA: Lhaphul nisim 30, 2021 (Patthen ni) in Kho-ken vangkho a cheng Pu Paotong DOUNGEL le Nu Deilhing DOUNGEL chanu, athum channa Ng. Lamneichong DOUNGEL, kilom tahin akieng neina din Pathen minin vang thumpehna le Lhahdohna kin akimang in ahi. Lhahdohna kin hi SOP dan dungjuiyin kimanchahna akineijin, Pr. Letkhoson Haokip, KBC Gambih No.7 Pastor, kin thempun apang in ahi. Vetjui theitah le kilomtah a kiengneina kin bolding khohsah Ng. Lamneichong chungah Gambih in kipapina thu sangtah in aphongin chuleh Christian insung nomtah hin semdoh minu phatah hidingin jong vailhahna aneijui.

(iii) HOUDANTHENG A KIENGNEI DINGA LHAHDOHNA: Lhadou, nisim 4, 2021 Gansemni in KBC Gambih No. 7 hopsunga um, Lambung Joujangtek houbunga um Pu Tongkam le Nulun Lhingkhoneng laigilga Ng. Nengnunmoi Haokip chu Pathen Hou Dantenga kiengnei dingin vang thumpehna le



vailhahna kin, Pr. Paogoumang Chongloi, Pastor C/Ch. Joujangtek thempu hinan lolhing tahin akichai tai. Vannoi boina natna hise laang jongleh Pathen jallin lolhing tah in kin akibol thei jin, hiche kin suhbulhit ahina dinga pan lentah hinla Gambih Pastor, Gambih Chairman KBC No.7, Church Pastor le Board of Deacons chuleh houbung mite jouse chungah kin neipa Pu Tongkam le a-insungmiten kipathu ahin phonge.

GAMBIH NO.11

OFFICE THAH SAH DING: "Gambih Office inthah sah ding" tia Gambih in kilolna anei utoh Ihonnin, Gambih Executive Committee, KBC Gambih No. 11 in tutua Gambih Office a aneiju inn chu aluival tah jehin Office ding inn thah sah pat nadingin Social work masapen Lhaphul, nisim 8, 2021 nikho in anabol pan tauvin ahi.

GAMBIH NO. 15

KICHENNA KINTHENG: Gamsunga natna hise lang henlang boina tampin eitomkhum u jongleh S. Khudengthabi, KBC Gambih No. 15 ah Lhaphul nisim 14, 2021 nikho in Gl. Lunminthang le Ng. Hoineikim, Covid guidelines le SOP jui



pumin Hou dantheng in kichenna kin lolhing tahn ana kichai thei-yin ahi. Hiche kichenna kintheng Thempu'n Rev. Thanglen Haokip, Gambih Pastor apang in ahi.

GAMBIH NO. 20

(i) CHATE CAMP: Achesa Lhaphul nisim 28-30, 2021 sung chun Samukom Baptist Church, KBC No. 20 a sunga lhagaova lamvai tading chate ho khohsahna jalla Houbung in tomngai tah a agon u "Chate Camp" chu lolhingsel in ana chelha tai. Chate Camp kibolna sungah chun Camp Speaker in Evan. Pretty Lhingneilam Kipgen apangin chule Camp Director panmun, Pastor Seikholen Kipgen, Pastor, KBC C/C Molkon in lan ahi. Camp a pang chapang hon maban lhagao hinkho lam saotah ahinjotna diu itaonau va ijuu jing diuvin Pastor Seikholen Kipgen, Camp Director in KBC mipite temna jong aneiijn ahi.

(ii) TAHSAN TUILUTNA: Lhaphul nisim 30, 2021 jinglam nidan 8:00 chun Molpi Baptist Church, KBC No. 20 a tahsan twilutna kin ana kibol in, Houbung sunga pasal 5 le numei 3 in Christa atahsan u aphondohnau vetsahnan Gambih Pastor Seiboi Haokip khut ah Apa Pathen, Chapa Pathen chule Lhagao-theng Pathen minin tahsan twilutna anei tauvin ahi.

(iii) KICHENNA KINTHENG: Achesa, Lhaphul nisim 20, 2021 nikho chun Gambih No. 20 Youth Chairman, Gl. Paolun Haokip le Ng. Tinneichong Lupho, Houdantheng in Gambih Pastor, Seiboi Haokip kin Thempu hina'n Apa Pathen, Chapa Pathen chule Lhagaotheng Pathen minin akicheng lhon tai. Gamsunga



Lockdown umjong leh Tengenoupal District Deputy Commissioner Shri. N. Praveen Singh phalpehna noiya Kichenna Kintheng lolhing-tah in ana chelhan ahi. Gamsung thula le la hahsat laitah chuleh che le va le hahsat lai tah a District Magistrate in phalpehna apeh jallin achungah Gambih No.20 kipathu jong aseiyeh.

NUTE NIKHO:

(i) TWILELON B/CHURCH: Ichennau gamsung muntinna Lock-down le Covid Protocol jehin Nuted nikho mang talou tampi um jongleh, Pathen phatthei bohna jallin Twilelon Baptist Church (KBC



Gambih No. 12) in NUTE NIKHO loupitah leh thanom tah in ana mang tauvin ahi. Nuten labung ngeitah asah utoh lhonnin Houbung BYD in 2021 NUTE lapi ngeinom umtah in asauvin, Speaker in Pastor Lunlal Dounge (Gambih No 12) apangin 'Sana pahjem jouse sanga hoijo minu'. (Proverbs 31:10) akon kiladoh THUPI mangchan minu melhoina, aloupi leh amantam dan thu a tilkhouna aneijin ahi.

(ii) GAMPHAJOL B/CHURCH: Lhaphul, nisim 9, 2021 (Pathen ni) in jong Gamphajol Baptist Church, KBC No.14 a Nute nikho kilom tahn akimang in, Nikho kiman kipapina le houbung nute jouse ngailut vetsahna in Pate chule Khotol Haosapun nute thilpeh aneijin ahi.

(iii) T. LEIJANG B/CHURCH: Vannoi boina tampin eikhaangkim vel u jongleh Pathen mihepina jallin vannoiyin pha anasah sa Nute Nikho, T. Leijang Baptist Church, KBC Gambih No.11 ah jong lolhingtah in ana kimang in ahi. Nute Nikho thupi seijin Gambih Pastor, Rev. Pillar Paosei Haokip apang in ahi.

(iv) THINGPHAI B/CHURCH: Thingphai Baptist Church, KBC Gambih No.14 a jong kipah thanom tahn houbung mipiten Nute Nikho boina ima umlou hellin lolhing tahn anamang uvin ahi. Pathen thangvah in umhen.

(v) SONGJANG B/CHURCH: Vannoi boina jehin lung sa-ihna tamtah umjongleh Songjang Baptist Church, KBC Gambih No. 6 in jong Thanom tahn Convention tohgon Nute Nikho – 2021, Lhaphul nisim 9, 29021 nikho in taona jallin lolhing tahn amang un ahi.

(vi) KBC NUTE NIKHO ZOOM SERVICE: Achesa Lhaphul nisim 9, 2021 nikho in Convention level in NUTE NIKHO Zoom Service jong ana kibol in, Rev. Tongmang Haokip, Secretary Men Dept., KBC in thupi ngaitah aseijin ahi. Zoom service a panla mi 55 ahin chule YouTube Live Steaming a anave mi 368 alhing in ahi. Pathen jallin kisuhmona umlouvin Nute Nikho Online service in akichai thei in, pan hinla ho jouse chungah kipathu akiseije

KAWLGAM AKON A HUNG GALJAM HO VILNA KINEI: Kawlgam sunga Tatmodaw ho sosetna le gimbolna a kon sochatna dinga India gam-sung adeh a Moreh le akimvel a hung galjam kolgam a isopi hou Kuki Christian Leaders' Fellowship leh Kuki Women Union lamkai chengin, Lhaphul nisim 5, 2021 nikho in vilna anei uvin ahi. Hiche agenthei galjam ho vilna sunga chun lamkai chengin Pathen hengah agaljam ho dingin taopehna aneyun, chuleh Sum le pai, Anchang, Dal leh nitin ngaichat thil chom chom tampi jong pehdohna aneyun ahi.

VANGSETNA CHUNGA SETVETNA: Tu masang jep a achenna Lhangcham kho a vangsetna anatoh Pu Letthang, a inn meijin akahlhah setvetna in Lhaphul nisim 5, 2021 nikho in Rev. Dr. M. Thongkhosei Haokip, General Secretary, KBC leh Rev. Tongmang Haokip, Secretary, Men Dept. in Kuki Baptist Convention Administrative Office minin Dangka 20,000/- ana pe lhon tai. Maban a hamphatnan ajui uva a-inchen akidodoh kitna diuvin jong lunggil tahn Pathen hengah, tua abusahna Haolenphai munna taona jong aman peh lhonnin ahi. Hitobanga ki-khotona Convention level a ahung bol lhon jehin KBC Office, gambih chule houbung jouse chungah Pu Letthang in kipathu ahinseije.

COMMITTEE MEETING: Ahunglhung ding KBC Pentenial Fellowship 2022 lolhing tah a achelha ding deisahna jallin Convention in ngen-sena apeh Sound & Light Committee chengin amasapen din Lhatun, nisim 28, 2021 nikho KBC office muna lunggelkhomna aneyun ahi.

KUKI CHRISTIANTE LAH'A AMASAPENHO

1. 1968-1978 sung in Pu S.K. Loukhosei KBC Finance Secretray masapen in ana kipan sah e.
2. 1977 kum in Pastor Laljakai Kipgen chu KBC natong Pastor-ho lah a pension che masapen in anapang tai.
3. 1981 kum in Rev. Thangjalhun Hangsing chu KBC natongho lah a Medical Pension kisol masapen in ana pang e.
4. 1981 kum in KBC in "Press" masapen anakineidoh in Pu Hem-lun Haokip Full time Manager masapen in anapang e.
5. 1982 kum in Pu Solet Haokip le Rev. Seikholet Singson President le Secretary masapen hina in KBC Men Society ana kiphut-doh e.
6. 1976 kum in KBC in Associate General Secretary ana kibol pan in Pu S.N. Gangte amasapen anahi.
7. KBC gamsung Solam le Lhumlam a Youth Promotor ding in Pu Sehkhothang le Pu Thangkhojam ana kipansah masapen Ihon e.
8. 1979 kum Rev. Yangthong Haokip chu KBC Mission Full time Secretary masapen in ana kigoi e.
9. 1986 kum in Pu Capt. Lalkholun Haokip chu KBC Mission President masapen in ana kilhengdoh e.
10. 1980 kum in KBC Nepali Project noi a Manipur gam a Heng-bung mun a Nepali Church masapen Rev. Seikholet Singson in thensona ana nei e.

~ Courtesy : KBC Thuchinbu

TAHSA LEH LHAGAO PUIHINGTHEI THUGOLHO

1. Namsung leh society khantou nadin mipha tamtah angaije. Mipha mipan ahin semdoh ding ahin, mipa mopohna lentah ahi. Minu ngansena ahileh lolhinna vat ding ahi. Chapang in kam'a kihilna sangin natoh'a kihilna ajuithei jin ahi, chate juithei dingin hinkho mang in.

2. In chendoh theina din pot-tho, gin-ngai, tom-pan, kikhi thiem leh natoh dingdan guontoh masat angaije. Guontoh masatna (Planning) um louvin thilpha akibol doh jouji poi, ima jousea planning kisem Cheh angaije.

3. Thillen thil thupi khat boldoh nadin tom-pan, thohg hat, nga-hat chuleh i-lolhin kahse'a bolbol dinghi angaije. Lungl-hah leh thaset loihi losapna ahi. Nalolhin masang sen dalha hih in. Lolhinna din avel vella bolzong angaijin ahi. Kalbi 17.

4. Hinkho'a lolhin nadin aphalam mumi hi (positive attitude) angaije. Aphalam mu mi hithei nadin self improvement lekha hasim ding chuleh kivoppi kilhen thiem ding angaije. Apha-loulam mu miho (negative attitude) lolhinna alhom jin ahi.

5. Thil ima jouse abol dingdan umsoh kei ahi. Aboldan hclou-va bol lolhinna hilou ding ahi. Nabol nuom boldoh thei nadin tohguon (planning) nei masan, chuleh alampi holmasan, chutieleh nalolhinna bailam ding ahi.

6. Tulai loulho nading gam tamtalou ahitah jch'in dan khel angai te. Masang'a inabol khahlou, khut thicm (mistry) natoh, sumkolvei, farm lou bolding tilou kihinsona hahsa ding ahi. Apat dung juija kikhel angaite.

7. Khangdonlai tahsa ngaichat lungvul (sexual urge) hattah ahi. Hiche tha hattah hi aphalam boldoha ding'a heilut angaije. Achuti louleh manthah na lampia eipuilut thei hiding ahi.

~ Courtesy: Kalbi 40

Servanthood Quotes

I am Thy servant to do Thy will, and that will is sweeter to me than position or riches or fame, and I choose it above all things on Earth or in Heaven.

Aiden Wilson Tozer

Above all, leadership is a position of servanthood.

Max De Pree

Motherhood is a great honor and privilege, yet it is also synonymous with servanthood. Every day women are called upon to selflessly meet the needs of their families. Whether they are awake at night nursing a baby, spending their time and money on less-than-grateful teenagers, or preparing meals, moms continuously put others before themselves.

Charles Stanley

Your best servant is the person who does not attend so much to hearing what he himself wants as to willing what he has heard from you.

Saint Augustine

As we look ahead into the next century, leaders will be those who empower others.

Bill Gates

Perhaps the feelings that we experience when we are in love represent a normal state. Being in love shows a person who he should be.

Anton Chekhov

Love is the master key that opens the gates of happiness.

Oliver Wendell Holmes Sr.

Your present circumstances don't determine where you can go; they merely determine where you start.

Nido R Qubein

LUNGHEM PI NA

OBITUARY



Rev. Dr. HawIngam Haokip, KBC Emeritus General Secretary in gelphah lou a dammona jeh a nisim 5th May 2021 nikhoa JNIMS Hospital mun a eina mollep san uhi vangset umtah ahi. Convention in adalhah insung mite jouse leh Houbung Chule convention worker ho in pohnatna leh lunghem na sangtah aki-neijin, hijongleh Pathen thilgon a aman eidalhah uhi lungmon na leh Pathen umpi na ichan theina ding uvin itao uve. Pathen in ei umpi tao hen! Pu (L) Rev. Dr. HawIngam Lhamong in choldo mai tan.



KCLF leh KWU in Kolgam a pat a hungjam doh ho avilna



KBC Pentenial fellowship 22 Sound & Light Commitee.
Toukhom masapen



Pu Letthang tumasang a a in mei in ana kah vilna

Post Regd. MNP/81
Regd No. 18134/88

Mun phabep a Nute Nikho kimanna



If undelivered, please return to
The Editor, KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173